



Alle Jahre wieder: Wéi Dir jo wësst fuere mir bei de Scouten nëtt nom Kalennerjoer, mais nom Scoutsjoer, dat sëch um Schouljoer orientéiert. Mein Aperçu z'Joert op der Generalversammlung 2011 hat mat der Sommervakanz 2010 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2010/2011.

D'Scouts-Joer 2010/2011 bei de Scouten St. Martin Duelem

- Fir unzefänken, well ech hei emol e klengen Aperçu ginn, wéi grouss eise Grupp an der Saison 2010/2011 war. Fir daat Scoutsjoer, daat eis den owend hei beschäftegt, hate mir genau **120 Leit** beim Verband vun den LGS als Memberen ugemell. Dëss 120 Leit setzen sech zesummen aus: 22 Biber, also Scouten tëschen 5 an 8 Joer, 19 Wëllefcher, tëschen 8 an 11 Joer, 18 Avex also Meedercher a Jongen tëschen 11 a 14 Joer, 7 Carapio'en, Jonker vun 14 bis 17 Joer, 12 RaRo, also Scouten iwert 17 Joer, 23 Cheftainen a Chef, déi eis verschidden Branchen leeden a begleeden an 19 Frënn déi eis als Amicale zur Seit stinn. Dëss 120 Leit sinn nëmmen déi, déi mir fest beim Verband ugemell hun. Dobei kommen nach eng ganz Reih vu gudde Séilen, déi eis bei Bedarf tatkräfteg beisprangen ouni awer beim Verband fest ungemell ze sinn. An der Suite, well ech Iech en Iwerbléck ginn, iwert daat, waat déi 120 + an der Saison 2011/2011 zesummen op d'Been gestallt an erlieft hun.
- Mëttwochs de 15ten September 2010 war den **LGS-Kongress** op deem eise Grupp mat 5 Cheffen vertrueden war fir déi nei Saison um Verbandsniveau administratif ze beobachten a matzegestalten.
- Sondes den 20ten September 2010 waren d'Cheffen aus dem ganze Land nees op den **LGS-Cheffdag** agelueden, fir do déi nei Konsignen vum Verband fir déi nei Saison ze kréien. Eng grouss Delegatioun vun eisem Grupp, huet dess Invitatioun ugehollt an ass am gréngen Hiem op Stengefort gefuer fir do en neit Konzept vum Cheffdag matzerliewen. Déi nei Saison ass, wéinst dem Joer vun der Biodiversitéit ausdrécklech ënnert den Thema „Natur“ gestallt ginn. Op dësem Cheffdag huet eise Scouts-Verband **e Concours** lancéiert ënnert dem Slogan « *100% Bësch, 100% Guide a Scout* ». Bei dësem Concours, deen sech un all d'Gruppen am Land adresséiert huet, gong et drëms, ënnert der aktiver Mathëllef vu méiglechst ville Kanner a Jugendlech vu verschiddenen Alterstufen, e Projet zum Thema « *Bësch* » op d'Been ze stellen. Mir Scouten vun Duelem hun am Laaf vum Hierscht fir dëse Concours e Projet "*Naturléierpad*" geplangt, an am Verlaaf vum Scoutsjoer mat der finanzieller Ënnerstëtzung vun der Duelemer Gemeng, an der tatkräfteger Mathëllef vun eisem ganze Grupp, realiséiert an ageschéckt. Vun dësem Projet wäerte mir an dësem Rapport, an an deem deen ech d'nächst Joer hei virdroen wäert, nach méih dacks héieren.
- Vir Dënschdes den 21 September hate mir eis Memberen mobiliséiert. En trauregen Evenement stoung am Raum. Eise Aumonier a Frënd; de Pater Flies sollt eis verloossen. Mat enger breeder Präsenz an der Owendmass zu Duelem; an enger klenger Feierstonn mat Réckbleck an Agape, hu mir „eisem“ Pater Eddi a Merci gesot. Virun dem offiziellen Deal, huet eis Cheféquipe vun der Gelegenheit profitéiert, fir eng éischte Kéier brancheniwergreifend zesummenzekommen, an déi no Zukunft ze plangen.
- Samsdes den 2ten Oktober war eise **Schnupperdag 2010**. Fir dëst Joer hate mir un deem méih schlanke Konzept vum Viirjoer festgehalten. Duerfir hu mir d'Kanner am **Biber** a **Wëllefchers**-Alter fir dëse Samsdes an déi normal Versammlung vun der jeweileger Branche invitéiert. D'Gesamt Chefféquipe huet

déi jeweileg Branchecheffen renforcéiert, an de Kontakt mat den Elteren matiwerholl, an esou konnten déi nei Kanner emol richteg an eng Versammlung eraschnupperen, a bei Spill a Spaass materliwien wéi et bei de Scouten zougeet. Eng Kaffistuff mat frëschen Eisekuchen a Schoky fir d'Kanner huet dësen 1ten Akt vun der neier Saison op eisem Terrain enkadréiert. Um Enn vun deem Daag hate mir eng 14 nei Nimm op eise Lëschten. Mir waren gudd an déi nei Saison gestart a géifen also nach nett sou bal ausstierwen.

- Sondes den 3ten Oktober waren eis gréng Hiermer nees een vun de grouse Kontingenten bei der Feier vum nationalen **Komémoratiounsdag** an der Gemeng Duelem
- Freides den 8ten Oktober 2010 war fir eis e groussen Dag. Eise Frënd a Gruppecheff de **Steve** a sein **Monique** sollten sech op der Gemeng d'Jowuert gin. Fir dëss sougenannte gréng Hochzeit ze feieren, hate sie e Megafest mat hire Frënn um Neihaisgen organiséiert. Well de Gros vun eise Cheffen, do souwiesou als Gäscht oder Service-Leit dobei waren, hu mir déi traditionel „Heimsuchung“ zur Hochzeit direkt do owends um Neihaisgen gemacht.
- De folgenden Dag ass nomëttes um Neihaisgen mam nationalen **WE de lancement** och fir d'**RARO** déi nei Saison offiziell lassgang. Mat enger Nuecht am Zelt oder zum Deel ënnert freiem Himmel (et war ëmmerhin scho bal halwen Oktober!!) sinn dobei och 5 vun eise groussen op hir Frostfestegkeet getest ginn.
- Vum 16. op de 17ten Oktober hate sech eis **CaraPio** op Eesebuer zeréckgezunn, fir do den **JOTA/JOTI** matzeerliwien, bei deem ronderem de Globus Scouten um Kurzwellenfunkgerät an beim PC setzen, a via Funk oder Internet Kontakt mateneen ophuelen, an esou déi international Dimensioun vun der Scoutsbewegung konkret erliwien. Bei der Gelegenheit hun och nach e puer Explorer hir Montée an d'**Pioen** gemacht.
- Den alljährléche Montéeskarussell haat nees ungerang ze dréien. • Esou hun den 23. Oktober déi 10 gréisst a konfirméiertste **Biber** hire Wee bei **Wëllefcher** mussten untrieden, wou sie dunn erëm bei deenen ganz klengen waaren. Esou wäert et hinnen op hirem weidere Wee an d'Liewen nach méih wéi eng Kéier ergoen.
- Samsdegs den 23ten Oktober war **RaRo-Projetsnuecht** am Konservatoire an der Stadt. Do goufen enger breeder Öffentlechkeet déi 5 Entwécklungshëllefprojete viingestallt, déi d'**RaRo** Branche vun de lëtzebuurger Guiden a Scouten an de lëschte Méint an Lateinamerika, an Afrika, an Europa an an Asien realiséiert haten. Well aus eisem Grupp och 6 vun eise Frënn selwer, an op eege Käschten, am Vietnam mat Hand ugeluecht haten, a well de ganze Grupp jo am Kader vum relais pour la vie 2010 zesummen 753 Tiir, also ongeféier 150 km gelaaf waren, fir vun eisen 183 Sponsoren 2.985,4 € ze kréien fir déi gelaafen Tiir, war dësen RV fir eis vu besonneschem Interessie. Et sief erviirgestrach, dass deen Owend, de Luc Panissod, de Generalsecretär vum WOSM (der Organisation Mondiale du Mouvement Scout) dobei war, a 70 lëtzebuurger **RaRo**, déi nach e.a.e speziellen Rapport iwert hiren Asatz an der 3. Welt verfaasst haten, déi héichsten Scouts-Auszeichnung „**Scout of the World Award**“ iwerreecht huet. Ganz houfreg ware mir, dass aus eise Reihen, d'Emilie Degee esou en, dach raren Insigne kritt huet. Duelem waar nees eng Kéier ganz viir mat dobei.
- Vu Samsdes dem 13ten bis Sondes den 14ten November hate sech eis **RaRo** RV am ScoutsChalet zu Péiteng am Bësch ginn, vir hire **MontéesWE 2010**. Och wann sie keng Montéeskandidaten haten, hu sie awer dëse Camp ofgehalen, fir nëtt aus der Übung ze kommen. Eng Mega Pierrade, vill kleng Spiller a besonnesch d'Kannerspillplatz beim Chalet hun dervir gesuert, dass sech eis **RaRo** richteg wuel gefillt hun.
- Dënschdes den 16ten November 2010 hate mir eis nees eppes Gréisseres viirgehollt. Turnusgeméiss wollte mir dëst Joer nees eise Patréiner den **hellege Mäerten ganz grouss feieren**. Duerfir hate mir dësen Dag festgehalen, nodeems de richtegen Dag, den 11ten November enger Majoritéit vu Cheffen nëtt méiglech war. Nomëttes ab 16:30 hu mir eis am Home zesummenfonnt, fir d'Mass viirzebereeden an e Réckbleck ze maachen, op dat wat eis **RaRo** a Cheffen am Summer am Vietnam am Kader vun engem Entwécklungshëllefprojete gemacht haten, ënnert anerem mat deenen Suen, déi am März 2010 bei eisem Charity-run beim relais pour la vie zesummekommen waren.. Duerno hu mir zesummen d'Mass gefeiert, déi mir och animéiert hun. No der Mass hu mir Opstellung geholt fir e Cortège duerch Duelem. Virop ass den **hellege Mäerten** um Iesel geridden. Dat war zwar theologesch villeicht nëtt ganz korrekt, mais e Pärde war eis fir eise klengen Mäerten ze grouss an ze onsecher. Hannert de Mäerten koumen d'Kanner mat de

Lanteren an eis Gäscht, an zum Schluss huet d'Duelemer Musek mat schmasseger Marschmusik fir den néidegen Tempo an déi richtig Ambiente gesuert. Zum Ofschloss hu mir eis mat alle Leit déi wollte matkommen, hannert dem Home bei engem warme Bouillon, engem Wirschtgen an engem gudde Patt afonnt, während e groust Martinsfeier op der Wiss d'Keelt an d'Daischtert a Schach gehalten huet.

- Samsdes den 20ten November hate mir eng Reih Leit hannert dem Home op der Wiss am Paschtoueschgaart zesummegezunn. Eng grouss Planzaktioun war ugesot. Am Kader vum Centenaire vum Guidissem an dem nationalen Dag vum Baam hat de Verband vun den LGS d'Aktioun „ **100 Beem fir 100 Joer Guiden**“ organiséiert. Ënnert der Beroodung vun der adm. de la nature et des forêts, krute mir vum Verband 6 Héichstammuebstbeem, Hammierplanzen an 50 laafend Meter Hecken gestallt an déi goufen deen Dag, an der Präsenz vun eise Gemengenautoritéiten geplanzt.
- De 27ten November 2010 war schon nees en neit Kierchejoer fälleg. Den 1ten Advent stoung vrun der Diir. Domat war fir eis och nees de RV gestallt, fir eng ganz Reih **Adventskränz** schéi geréscht, pénktlech un de Klient ze bréngen. Duerch dem Annie seng wonnerbar Virarbecht an Organisatioun hu mir och dëst Joer nees eis Klient'en zefriddestelle kënnen. An eis Kees kruut eng kleng Stärkung virun de Wantercamp'en.
- Sondes den 28ten November 2010, dem 1ten Adventssondeg, war nees zu Fëlschdref **Porte ouverte am Buttek Mosaik**. Et ass fir eis Chefféquipe an der Tëschenzeit eng flott Traditioun gin, sech un der grousser kollektiver BA mat dem Gromperekichelchersstand ze bedeelegen. Esou ware mir och dest Joer mat eisem Stand présent an hun mat vill Freed matgeholf, déi Porte ouverte zu engem Erfolleg ze maachen.
- Freides Owends den 3ten Dezember hun eis RaRo an hirer Versammlung d'Stécker vun der **Duelemer Krëppchen** aus dem Summerlager hannert der Uergel erausgehollt, an zur Montage op déi richtig Platz bruecht.
- Samsdes de 4ten Dezember 2010 war eng grouss Opregung am Home. 2 friem Gestalten, eng am roude Bëschofs-outfit an eng am schwarze Geisterbahnen-look, ware mat engem grouse Saak an engem décke Buch bei d'Biber an d'Wëllef an d'Versammlunge komm. Richtig, **de Klés'chen an de Housécker** woren do. Et ass ëmmer nees schéin ze gesinn, wéi dem Klés'chen seng perséinlech Remarken iwert eenzel Kanner, déi hien all a sengem grouse Buch opgeschriwwen huet, wierken. Kleng Kënnercher wuesen förmlech beim Luef vun dem hellege Mann, während déi, déi eng konkret Reklamatioun ze héieren kréien, rout a verlé'en ginn. Op alle Fall hun se zesummen schéin hart gesongen an dunn krut jidfereen eng Tiitchen. Eng Partie waren der secher awer ganz frouh, wéi besonnesch dee schwarze Gesell nees fort war.
- Freides de 17ten Dezember, et war richtig Wanter mat vill Schnéi an Eis op der Strooss sin eis Avex mat enger Delegatioun op den Houwald geschlach, fir do d'Verdeelungsfeier vum **Friddenslicht vu Betlehem 2010** matzeerliewen, an fir eis déi Flaam mat op Duelem ze bréngen.
- Samsdes den 18ten Dezember hate mir fir de ganze Grupp an all eis Frënn eng **Krëschtfier** organiséiert. Mëttes fir halwer 3 hate mir eis RV um Parking vum Trimmparcours zu Medingen ginn. Daat war nett esou einfach dohin ze kommen, well déi ganz Nuecht ass nach Schnéi gefall, an d'Stroossen waren richtig zou. Vun do sinn mir mat dem Friddenslicht an eise Lanteren duerch de Bësch op Duelem an den Home getrëppelt, waat bei deem héige Schnéi, fir déi méi kleng Kanner mat de kurze Been guer nett esou einfach war. Am Home hu mir de Beemchen geréscht, eis de Film „the nativity Story“ op daitsch ugekuckt, eng kleng Veillée zum Thema vum Jesus senger Gebuert erlieft a schlieslech eng gudd Spaghetti zesummen giess, déi de Steve eis mat vill Geschéck pénktlech gekacht haat. Eng kleng géigenseitig Bescheerung a gemeinsam Sungen vu Krëschtlidder hun dëse flotten Moment op en Enn bruecht. Midd awer zefridden hun eis Cheffen nom Départ vun de Kanner, nach zesummen e Patt Glühwein gedronk.
- Vum 20-24 Dezember haten d' Avex sech fir hire **Wantercamp** , op Dikrech an de Chalet "Joli Site" zeréckgezunn. De Camp stoung ënnert dem Thema "**Big Brother** ". Fir dat méiglechst getrei dem Viirbild i um Fernseh ze gestalten, hun d'Cheffen missten déif an d'technesch Trickkëscht greifen. Ganz nom Motto vun der Show, hun d'Kanner verschidde Spiller gemach (Domino Day, Städtespill...) fir sech hir Molzechten ze verdingen. De Wanter huet seng Muskele spille gelooss, an d' Avex sinn am Schnei

ennergangen, wat zu enger spontaner Plangännerung gefouert huet. Statt dobannen agespaart ze sinn, warelo Iglu bauen ugesoot. Mat dësem Effort hate sech d'Avex du och eng XXL Trapperkichen verdengt. Als gudden Ofschloss as et nach emol spannend ginn wéi et geheescht huet heem fueren. De Wanter haat nach emol zougeshlo a moies war et nach nëtt sëcher, ob sie dee Wee iwerhaapt packe kéinten. Mais eis Chefféquipe huet sech nëtt aus der Rouh brénge gelooss, a fir nomëttes ware sie nees zu Duelem fir ganz traditionell nach Friddenslicht bei Leit aus eisen Dierfer ze bréngen, deenen dëst Symbol fir d'Gebuert vun eisem Här Jesus Christus eng Freed konnt bereeden. Mat der Feier vun der Krëschtmetten zu Duelem, goung dësen memorable Wantercamp op en Enn.

- Op helleg Owend haten eng Reih Leit aus eise Reien owends virun der Kiirch en **Zelt** opgeriicht ënnert deem **no der Metten** d'Leit alleguer nach e Patt Glühwein an e puer Krëscht dags-Kichelcher konnten zesummen genéissen. E puer vun eise Memberen déi och an der Musek sinn, hu mat hiren Instrumenter an e puer Krëscht dagsklassiker fir eng flott Stëmmung gesuergt, wou de Schnéi deen weider gefall ass och nach gudd dobei gepasst huet.
- Dëschdes den 11te Januar 2011 sin eis Avex an hirer Versammlung erop an d'Kiirch gangen, vir d'Stécker vun der **Krëppchen**, déi vu aneren Leit ofgeriicht gin war, nees ob hir Plätz hannert der Uergel zeréckzebréngen.
- Fir Dëschdes de 25te Januar hate mir eis Memberen, eis Frënn an eis Gemeng invitéiert, fir un eiser **Generalversammlung 2011** deelzehuelen. E reich gefüllten Aktivitéitsrapport, en Keesebericht bei deem d'Krise am Finanzsektor keng Spueren hannerlooss hat, a vill Projet'en fir d'Zukunft hun och dëst Joer nees gewisen, dass eise Grupp voller Liewen an Dynamik ass.
- De 5ten März hunn d'Biber an hiirer normaler Versammlungszeit Fuesend gefeiert. Jiddereen war verkleed, et gouff gedantzt, gespillt a giess. Duerno kruten déi nei Biber hiren Foulard iwwerreescht.
- Freides den 11te März 2011 war ab dem spéiden Nomëtteg am, a ronderëm den Home, verdächtig vill Betrieb. Kee Wonner! Eise Grupp war 5 Deeg virun, 18 Joer aal ginn, also groussjäreg, an daat sollt mam ganze Grupp gebührend gefeiert ginn. Eis **Geburtsdagsfeier** haat et a sëch: Retrospektive, Danksagungsmass, Fierkeliessen, Geburtsdagskuch, Veillée, Luftballonconcours an Geburtsdagslidd, un alles war geduecht. An endlech krut eise Grupp och de Führerschein.
- Freides den 18te März 2011 waren den Tim an de Carlo an eng Partie vun eise grouse Scouten an de Staater Kolléisch invitéiert ginn. Do ass deen Owend d'Remise d'insignes **vum mérite jeunesse 2010** iwert d'Bühn gang. 7 vun eise Leit aus Chefféquipe a RaRo haten hei déi néideg Efforten opzeweisen, fir datt sie aus der Hand vum Pränz Guillaume hir Auszeechnung kritt hun. 3 mol Bronze a 4 mol Sëlwer ass op eis Frënn d'Sarah Harik, d'Tamara May, de Jérôme Wintringer, d'Emilie Degee, de Marc Kaufmann, de Ben Seil an de Stanislas Vandivinit niddergang. Duelem war alt nees eng Kéier dobei (och, a besonnesch beim Iessen vun de leckere Schnittercher).
- Sondes de 27te März 2011 hate mir eis Cheffen, eis Amicale an all déi, déi eis op der Kirmes gehollef haten fir e gemeinsam **Iessen** invitéiert. Esou konnte mir deene Merci soen, déi eis am läschte Joer ënnerstëtzt haten, an d'ganz Chefféquipe an d'Amicale konnten bei engem gudden Maufel, a munch guddem Patt aal Erënnerungen opfrëschen, an nei Projet'en austüftelen. A well der Steve, dank gudder Connections a vill Asatz a savoir-faire, de Menu sur place selwer opgabaat a färdegemacht huet a well jidfereen eng kleng Onkäschtebedeelegung selwer bezuelt huet, ass et emol keen grousst Lach an d'Kees domat gin.
- Gréngendonnegdes den 21ten Abrëll 2011 owends, hu sech 7 Avex a Pionnier mam Carlo an der Kiirch getraff fir mat der Feier vun der Gréngendonnegdesliturgie déi scho bal traditionel Ouschtervorbereitung „**Operatioun Getsemani**“ ze starten. Hei geet et drëms, fir bewosst déi Nuecht virum Jesus sengem Opferdoud um Kraitz ze erliewen. En Nuetsmarsch duerch de Bësch, eng Veillée an eng kuerz Nuecht an engem Chalet am Bësch hun den 1ten Dag ofgerënt. Karfreides si sie dunn op Duelem komm, fir an enger gemeinsamer BA den Home an d'Wiss ze botzen an NoMëttes de Jugend a Kannerkraitzwee vu Felschdreff op Duelem mat zegestalten. Esou ware sie gudd op d'Ouschterfest viirbereed.

- Samsdegs den 30ten Abrëll, et war nach nëtt Hochzeit, mais fir eis schon höchste Zeit, hun mir eis Frënd a Gruppecheff de **Steve** moies ëm 10:00 Auer zu Lentgen mat enger Coupe Schampes empfangen, an hien zur Feier vu sengem **Jonggesellenabschied** entfouert. Well mir hien op deem schwéiere Wee an den Hafen der Ehe nëtt nach quäle wollten, hu mir probéiert him e flotten Dag ze schenken, mat Footing um Wenzelspad, Geocache, Intecourse, Cercle-visite, Sauna a Massage. Owends hu mir eis mat him zu Duelem bei enger Paella erëmfonnt, an esou konnte mir him, mat muenechem gudde Patt Courage maachen fir de groussen Dag, deen 8 Deeg méih spéit sollt stattfannen.
- Samsdegs de 7te Mee 2011, haat all Duelemer Scout deen et nëmmen anriichte konnt de Wee op Lëntgen fonnt. Do sollt deen Dag de **Steve sei Monique richtig an der Kiirch bestueden**. Bei allerbäschtem Wieder waar et eng Billerbuchhochzeit. Alles huet gestëmmt, et war einfach schéin! Vill vun eis haten de Plaiséier, dëss Hochzeit als Invité dierfen ze erliewen. Anerer hu sech eng Eier draus gemacht, eise Gruppecheff nach mat e puer typeschen Scoutsspiller vum Schampes ewechzehalen. Wéi beléift de Steve an d'Monique sinn, daat huet d'Zuel vun den Zaungäscht gewisen, déi komm waren fir ze kucken an ze gratuléieren. Vum ville Kussen haten sie um Enn ganz rauh Backen a Lëpsen.
- Mais deen Dag hätte mir eis bal iwerschloen. Well op deem selwechten Dag ass och nach eise Frënd a **Pioscheff de Steve Thill op der Gemeng bestued** ginn. Deen Daag waren definitiv d'Steven un der Reih, an eenzelner vun eis stoungen virun dem schwierege Problem op 2 Hochzeiten danzen ze sollen, waat jo awer bekantlech nett sou gudd geet.
- Samsdegs de 14te Mee 2011 hu sech owends eis Avex, verstärkt mat e puer Avex vu Gréivemaacher am Home afonnt, fir Kierper a Geescht op den Effort vum **Pélé des jeunes 2011** anzestëmme. Ganz fréih an der Nuecht si sie opgebrach, fir Sondes moies ëm 7:15 pünktlech an der Cathedral bei der Pélémass dobei ze sinn. Dat hätt awer nett geklappt, wann de Stanislas nëtt ee vun de Gréivemaacher Avex um Réck an d'Stadt geschleeft hätt. Eigentlech hätt de Stan duerfir och eng duebel Ratioun um Kaffisdësch no der Mass zegudd gehaat.
- De 17te Mee hu sech eis Wëllefcher mat enger klenger Delegatioun un der **Biber an Wëllefchersandacht** an der Cathedral bedeelegt, an esou op hir Manéier déi schéin lëtzebuenger Traditioun vun der Muttergottesoktave materlieft.
- Vum 21. op den 22.sten Mee waren d'Biber mat de Wëllefcher um **Päischtweekend** zu Colmarbiérg, souzesoen op der Generalprouf fir de grouesse Camp am Summer. Ennert dem Thema „Reeboulant“ hun d'Biber bei beschemt Wieder gespilt, gebastelt, a suguer gebaak. Bei de Wëllefcher goufen enneraanerem Geheimschreften geübt, a beim Cluedo hu se hier, „Spürnuesen“ asetzen mussen fir d'Spill ze gewinnen.
- Vum 28ten op den 30te Mee 2011 waren eis CaraPio nach eng Kéier am Asatz, fir sech op engem gemeinsamen **WE** mat aneren lëtzebuenger Participant'en op de grouesse **Weltjamboree** a Schweden am Summer **viirzebereeden**.
- Dëschdes den 31te Mee, matten an der Paischtvakanz, waar géint der Owend op der Scoutswiss op eemol décke Betrieb. Zelter, Comptoiren an eng grouess Bühn goufen opgeriicht. Christihimmelfahrt, an domat eis Scoutskirmes 2011 stoung virun der Diir. Bis Mëttwochs den 1te Juni owends, musst alles bereet sinn, fir eisen neien Versuch de Virowend vun der Kirmes nees méih attraktiv ze maachen. Well d'Zuel vun den Optrëtter bei eiser traditioneller Playbackshow déi läscht Joeren ëmmer méih kleng gi war, hu mir no enger neier Attraktioun gesicht. Esou ass eise choix op en „Newcomer-festival“ gefall, mat deem mir 5 jonke, lëtzebuenger Musekgruppen eng Bühn an e Publikum bei freiem Entrée wollte bidden. D'Wieder huet matgespillt, an esou war dësem Versuch e schéinen Erfolleg beschieden. Och eis traditionell **Scoutskirmes** den 2te Juni 2011 ass dank grousssem Asatz vun all eise Memberen a Frënn zu eiser, an zu eisem Keesier senger, Zefriddenheet ausgefall an daat obwuel vill Leit fir d' Péngschtvakanz fortgefuer waren.
- Um Wëllefchersrally den 3te Juni 2011 zu Nidderanwen waren eis Wëllefcher op der Sich no den Nouten. Mat hiren Asatz an hirem Resultat hun eis Wëllefcher bewissen dat se den mindestens sou musikalesch sinn, wéi den DJ ötzi.

- Samsdegs den 25. te Juni haten eis Wëllef eng extra spannend a léierreich Versammlung. Sie hun e Besuch bei den **Duelemer Pompjé'en** gemacht, an fir d'éischt emol all dat spannend Material gewisen an erklärt krit. Mais domat nett genuch! Als Héichpunkt vun der Visite, konnte sie selwer emol e Schlauch halen, an gezielt mam Waasser sprützen. Wahrscheinlech hate se awer pression réduite op der Lanz, well soss wären eis NowuesKadette vun der Spretz hannertseg gebloose ginn.
- Sondes de 26te Juni 2011 war eng weider lass zu Duelem op der Scoutswiss. Fir eisen 18te Gebuertsdag wollte mir eng BA vis-à-vis vun eisem Verband maachen, an eng vun de jährleche Manifestatiounen vun den LGS op Duelem huelen. Well mir fir Cheffdag, a Wëllefchersrally nëtt déi néideg Infrastruktur zu Duelem hun, hate mir décidéiert, d'Organisatioun vum **Bibertreff 2011** ze iwerhuelen. Esou koum et, dass dee Sondeg moien eng 93 **Biber** also Scouten tèschend 5 an 8 Joer enkadréiert vun 21 Cheffen aus dem ganze Land, opgedeelt an 10 Equippen op der Wiss stongen, fir de Pétzelhond, ze erlëisen. D'Geschicht vum Petzelhond, enger aler iwerliwwert Figur aus der Zeit vun den Uuchten, hate mir e wéineg gepimpt, fir de Kader ze hunn an deem sech de Rally sollt oofspillen. 2 W'éer vu je 4 km waren ze goen op deenen 10 Aufgaben ze bewältege waren. Mir haten de ganze Grupp mobiliséiert, Cheffen, Avex, CaraPio, RaRo, Amicale an Elteren, fir all Posten op de W'éer duebelt ze besetzen, Lotsen op den 3 Iwergäng iwert Draikantongsstrooss ze postéieren, e mobilen 1t Hëllefteam, eng mobil Raviséquippe an eng Permanence op der Wiss ze assuréieren. Ganz spektakulär war den Optrëtt vun de réimeschen Zaldoten, déi an der Mëttesstonn vun der Porte ouverte bei de Ricciacusfrënn bei eis erof koumen, an de **Biber**, déi al Schatzkëscht bruecht hun, wouran de geklauten Tempeladler sollt sinn. Péinktlech fir de Schluss haten all Equippen hire Schlëssel fonnt, an d'Këscht konnt opgemaakt ginn. Mat dem Opstellen vum Adler op sengem original Sténg, war den Zauber gebrach, de Pétzelhond war erléist an d'**Biber** haten hir Aufgab erfüllt a konnten zefridden nees heemfueren.
- Amplatz vun engem grouse Summercamp haten d'RaRo dëst Joer méih kleng geplangt. Vum 30te Juni bis zum 2te Juli hu sie sech nees zu **Férange** am Lotréngen um Jang senge Weieren afonnt. Hei hun sie 3 Deeg Camp erlieft, wou sie d'gemeinsamt Liewen an der Natur, mat enger BA a Form vun enger Schaffaktioun kombinéiert hun. Mat der BA, hu sie eisem fréiere Gruppecheff vill schwéier Arbecht ofgehollt, an him esou nach nodréiglech Merci gesot, fir seng grouss Verdéngschter beim Demarrage vun eisem Grupp.
- Samschdes, den 02. Juli 2011 gouf mam Opriichten vun den eenzelen Statiounen, eng grouss Etapp geholl an eisem Projet „**Naturléierpad**“, dee jo fir de Cheffdag am Hierscht 2011 am Groussen sollt färdeg sinn. All Branchen hun hir Statioun, déi se an de Versammlungen zesummegebaut an ugemolt haten, op déi définitiv Plaatze bruecht an installéiert. D' **Biber** hiiren Insektenhotel, d' Wëllef hir Nistkästen, d' Avex hir DéierenFiguren, an d' CaraPio hiren Aquarium. Elo hun eigentlech nëmmen nach d'Panneauen an d'Weeweiser gefeelt, an den Naturléierpad hätt kënnen ageweitginn. Mais domat hu mir eis mussen bis an den Hierscht gedëllegen.
- Vum 19.07. bis den 23.07. haat et eis Wëllef fir hire **Summercamp** ënnert dem Thema „**Piraten sinn ennerwee**“ op Bilschdref verschloen. Hei ware sie mat dem Garer Grupp zesummen, deen sie 2010 um nationale Wëllefchercamp ALthing kennegeléiert haten. Et stunge Piratenatellen, Piratenspillen, en Daag an der Schwemm an eng Visite zu Machtelég an den Schiefergrouwen um Programm. Eis Wëllef haaten hir 2 gudd trei Seilen matt, de Jaap an de Jang. Déi 2 hu wonnerbar fir d'Wëllef gesuert Als Mädchen für Alles hu sie souwuel fir lecker gefüllten Telleren, wéi fir eng Seelbunn gesuert, alles zur gréisster Freed vun de Kanner. Zefridden sinn Kanner a Cheffen um Enn nees heemgefuer. Mais no Opregungen wéinst Knippecher déi angeblech an de falsche Baisch gelandt waren, an „non-Stop Kichendéngscht vun eise Leit“ huet eis Chefféquippe décideiert den nächste Camp erem léiwer eleng ze maachen.
- Hire **Summercamp** huet d'Avex op Colmar-Berg op d' Campplatz beim Chalet Hirsch geféiert. Vum 18. Juli bis den 28. Juli hu sie hei e ënnert dem Thema „ Réimer“ e flotte Camp mat Hike, Adventure Park, Schwemm, Städtspill, Chilldag erlieft. Deen Chill-Dag hu sie dréngend gebraucht, fir sech vun deem Schreck ze erhuelen, deen hinnen an der Nuecht op den 24 te Juli en arme Geesch verpasst haat. Deen Dabo war sech nett ze schued, eis Kanner am Schlof an den Zelter ze bestielen. Souweit si mir zu Lëtzebuerg komm, dass eng Jugendgrupp mol op dem Camp, matten an enger Uertschaft nëtt méih sècher

ass. De Stan, dee wakreg gin ass, wéi den trauregen Held bei him am Zelt sein Laptop geklaut huet, huet sech ouni Brëll a Schlappen op d'Verfolgung gemacht, an huet den Déif awer leider jhust nett erëmkritt. Oder soll een soen Gottseidank? Op alle Fall haat den traurege Viirfall d'Moral an d'Vertrauen vun eise Kanner am 1te Moment staark erschüttert. Mais eis Chefféquipe huet gudd reagiert. Sie sinn nëtt ofgezunn, an hun nëtt deem negativen Bild daat läscht Wuert gelooss. Sie hun hire Camp weider gemacht, an hu sech jhust fir ze schloofen an de Chalet zeréckgezunn, waat nëmme begreiflech ass, well sech wéinst deem erliefte Schock, d'Kanner nuets nëtt méih wuel am Zelt gefillt hun. Mais sou séier loossen sech eis Avex nëtt ënnerkréien. Sie hun nees an hirem Programm Trëtt gefaasst, an Dënschdes owends huet eng Delegatioun vum Grupp sie um Camp besicht, an hinnen gekacht, an no an no sinn d'Liewensgeeschter nees ganz erëmkomm, an de Camp konnt nach zu engem frouen Enn geféiert ginn.

- Vu Mëttwochs dem 20ten bis Samsdegs den 23te Juli 2011 waren och eis Biber fir hire **Summercamp** ausgeréckt. Fir de Camp **Wiltz-town 2011**. sollten sie mam Lucky Luke e Banktresor vun Duelem op Woltz bréngen. Mais ënnerwee goufen sie am Bambësch vun den Daltons iwerfall a kruten den Tresor geklaut. Kloer, dass eis Biber daat nett wollten op sech setze loossen. Eng intensiv Formatioun zum Hëllefssheriff war néideg, bis de Lucky Luke an d'Biber den Tresor nees zeréck eruewere konnten. Eng mega Siegesparty um Lagerfeier huet dëse flotte Camp zu engem gudden Enn bruecht Um Réckwee stoung nach eng Visite am Vitarium vun der Luxlait um Programm, éih d'Elteren hir Kanner midd awer frouh nees zu Duelem eremfonnt hun.
- Mëttwoches de 26. Juli hu sech 8 Duelemer CaraPio an 1 Chef um P&R um Houwald rendez-vous gin, fir zesummen mat 175 aaner Lëtzebuurger Guiden a Scouten am Alter zweschen 14 an 17 Joër op den 22nd **World Scout Jamboree a Schweden** ze fueren. No baal 10 Stonne Bus a Fähre si se zu Rinkaby ukomm wou prompt d'Schloof- an IessZelter, an eng Kichen opgeriicht goufen. No a no huet een zu alle Saiten aaner Zelter aus dem Buedem gesin erausscheissen die deelweis schons eng ganz laang Rees hannert sech haaten. Am ganzen haate sech iwwert 40.000 Guiden a Scouten aus aller Welt zesummefonnt fir während 10 Deeg flott Aktiviteiten (Dages-Hike, Plage, Challenge, Kirmes,...) ronderem d'Thema „**Simply Scouting** - Simplement du Scoutisme“ ze erliewen an nei Bekanntschaften ze maachen. Op engem Areal vun ±25 km² huet ee Guiden a Scouten vun HongKong, Brasilien, Chile, Australien, Jamaika, Costa Rica, USA, Japan, Uganda, Südafrika, an Duelem fonnt. Demno waren d'Viraussetzungen fir e flotten an eemolegen Camp alleguerten erfëllt. De ville Reen an de Bulli hun et nët faerdegruecht dei gudd Stëmmung ze verdiewen. Den 8. August 2011 waren eis CaraPio no 14 Stonnen Reckwee frouf a midd, awer reich un eemolegen Andréck an Erliefnësser nees heiheem. Ëmmerhin war dëss Rees fir eise Grupp eng Première. Fir d'éischte Kéier waren Scouten vun eisem Grupp op engem World-Jamboree, déi gréisste Scouts-Camp op der Welt déi direkt op eng Iddie vun eisem Grënner, dem Robert Baden Powell zeréckginn. Eng besser Gelegenheit, fir d'Internationalitéit vum Scoutsmouvement hautno ze erliewen, gëtt et nëtt. An Duelem war emol nees dobei!
- D'Versammlungen an d'Camp'en vun der Saison 2010/2011 waren eriwier, d'Summerrouh war ugebrach, mais et sollt eisem Grupp, a besonnesch 2 vun eise Frënn nach eng wonnerbar Première an d'Haus stoen. Sondes de 15. August 2011 ass daat klengt **Ella Pinto Vandivinit** op d'Welt komm. Déi 1t Koppel aus de Reihen vun eisen 1te Scouten, ass Mamm a Papp ginn vun eisem 1ten ganz rengrassege Nowuesscout. Ech sinn iwerzeegt, dass daat klengt Ella gréngt Blut an den Oderen huet, well als Kand vun esou Vollblutscouten wéi dem Nadine an dem Rafi, muss daat Kand ierflech viirbelaascht sinn. Datt sech d'Ella ganz strikt un d'Scoutsgesetz hält a besonnesch un de Punkt 9 deen do seet, „E Scout wees seng Zeit anzedeelen, an uecht deem anere seng Aarbecht“. Daat huet hatt bewisen andeems et mat dem OpdWeltkommen gewaart huet, bis sei Papp aus Schweden nees doheem waar a sech e wéineg vum Jamboree erblosen haat. Op alle Fall huet et eis déif beréiert a frouh gemacht, wéi dem Ella seng Elteren eise Grupp als Pätter fir hirt Kënd'chen gefrot hun.
- Nieft dësen méih speziellen Aktiviteiten gehéieren och nach opgezielt: ëm déi 120 Versammlungen déi d'Scouten vun eisen 5 Branchen zesummen haten, 4 Grupperéit an eng ganz Reih vu Präparatiounstreffen an der Chefféquipp. Et kéint een soen, mir hätten nees gudd geschäft am Scoutsjoer 2010/2011.

